


**Bene' Israel ca' besyega'ane' pres
Babilonia gayonši iz**



**Los israelitas fueron desterrados a Babilonia
por setenta años**

Bene' Israel ca' besyega'ane' pres Babilonia gayonši iz

**Los israelitas fueron desterrados a Babilonia
por setenta años**

**Resumen del Antiguo Testamento
en el zapoteco de Zoogocho
Volumen VII**

LA LIGA BÍBLICA



**LAS SAGRADAS ESCRITURAS PARA TODOS
LIGA DEL SEMBRADOR, A.C.**

“Las Sagradas Escrituras para todos”

Publicado por

LA LIGA DEL SEMBRADOR, A.C.

Apartado 14-351

07810 México, D.F.

La ilustración en blanco y negro opuesta a la página 1 así como las ilustraciones en las páginas 8, 10, 28, 33, y 35, son propiedad de la Fundación David C. Cook, usadas con permiso.

Primera edición

**Los israelitas fueron desterrados a Babilonia por setenta años
en el zapoteco de Zoogocho**

94-082 México, D.F. .5C

1994

Da' gole da' bžia Diosen' bia' gone'

Resumen del Antiguo Testamento

Este libro es el séptimo volumen del Resumen del Antiguo Testamento que presentamos en una serie de siete.

- Volumen I:** Can' goc cate' gwxe yežlion'
Cómo comenzó el mundo
- Volumen II:** Diosen' chebeje' bene' Israel ca' Egipto
Dios saca a los israelitas de Egipto
- Volumen III:** Bene' Israel ca' gosone' güedenag len
Diosen'
Los israelitas desobedecieron a Dios
- Volumen IV:** Bene' gosaclene' nación Israel gwde
got da' Moisésen'
Los líderes de Israel después de la muerte
de Moisés
- Volumen V:** Cate' gosenabia' rey Saúl na' rey
David bene' Israel ca'
Los reinados de Saúl y David en Israel
- Volumen VI:** Diosen' bonite' nación Efraín da'
gosejnlaže' lgua'a lsaca'
Dios destruyó la nación de Efraín por su
idolatría
- Volumen VII:** Bene' Israel ca' besyega'ane' pres
Babilonia gayonši iz
Los israelitas fueron desterrados a
Babilonia por setenta años

Introducción

Xtiža' Dios nyojen diža'xtil le'e libr da' nzi' LA BIBLIA. Part nechw nzi' EL ANTIGUO TESTAMENTO, na' zejen Da' Gole Da' Bžia Diosen' Bia' Gone'. Part gwchope nzi' EL NUEVO TESTAMENTO, na' nyojen diža'xon le'e libr da' nzi' Diža' Güen Che Xancho Jesucristo.

Libr da' noxo' nga nzi' Can' Goc Cate' Gwxe Yežlion'. Naquen libr nechw lao gaže cuen libr da' chesoen' diža' ģhe da' ca' zjanyoj le'e da' nzi' El Antiguo Testamento. Libr nechw nga nsan' da' zān da' žialao da' zjanyoj le'e part nechw ģhe El Antiguo Testamento, part da' nzi' Génesis. Gague nyoj doxen Génesis de diža'xon cont beyaše'ch libr nga. Še chaclažo' gwlabo' doxen Génesis, cheyaļa' yeyiljon le'e Biblia de diža'xtil.

Índice

sección

página

128. Nabucodonosor rey ɕhe Caldea bžiaye'e Jerusalénna'	1
129. Bene' ca' ne' nita' Judá ja'aque' Egipto	3
130. Rey Nabucodonosor goctonte'	5
131. Bene' Media ca' na' bene' Persia ca' gosone' gan bene' Caldea ca' na' gosenabi'e lao zan nación	6
132. Diosen' bosle' Daniel lao leon ca'	11
133. Šlac gosenabia' Darío len Ciro Diosen' bzejni'ide' Danielen' bica' da' ca' za' za'ac	13
134. Isaías bzoje' xtiža' Dios len bene' Israel ca' besyežin Judá	15
135. Rey Ciro be'e latje šjaya'ac bene' Judá ca' Jerusalén	20
136. Bene' Israel ca' gosone' yeto yodao' ɕhe Diosen' Jerusalén	22
137. Zacarías gwdixjue'ede' xtiža' Diosen' len bene' Israel ca' besyežin Jerusalén	26
138. No'ole le' Ester chosle' bene' Israel lao yeļa' goten'	27
139. Bxoz ben' gože' Esdras beyeje' Jerusalén	40
140. Nehemías bene' ɕhaɕh laže' bene' Israel ca' cont besyeyonšagüe' ze'e dan' nyeɕhj Jerusalén	42

141. Esdras na' Nehemías bosozejni'ide' bene' Israel
ca' cheyala' yosozenague' che Dios.....47
142. Malaquías be'lene' bene' Israel ca' xtiža' Dios...51



Jeremíasen' be'e xtiža' Diosen', gože' rey Sedequíasen'
cheyala' gwzenague' che Nabucodonosor.

128. Nabucodonosor rey che Caldea bžiaye'e Jerusalénna'

(2 Reyes 24:18 — 25:21; 2 Crónicas 36:11-20a; Jeremías 21; 24;
27:12 — 28:17; 32 — 35; 37 — 39;
Ezequías 17:11-18)

Sedequías bene' xa rey Joaquín gwnabi'e šnej iz
lao nación Judá. Lecz ca'cze bi bzenague' che ley
che Dios. Na' Jeremías be'e xtiža' Diosen', gože'ne'
cheyala' gwzenague' che Nabucodonosor rey che
Caldea, le Diosen' gwne' gone' cont bi yesałe' bene'
ca' yeseche' bene' Caldeos ca' Babilonia, san yesałe'
yogo' bene' yesaclaže' yesyega'ane' Judá o bene'
yesaclaže' šja'aque' Egipto. Lecze gože' Sedequíasen':

—Dios güe'e latje sen Nabucodonosoren' le' na'
chi'e le' Babilonia, perw na' gato' binlo.

Sedequíasen' bi bzenague' che Jeremíasen'. Na'
lecze gosenita' tgüejje bene' goseziye'e gosene' cheso'e
xtiža' Dios, na' legaque' gose'e Sedequíasen' Diosen'
gwbət güe'e latje gac Jerusalénna' lo na' Nabucodosor.
Lecze gose'ene' yob žin ža yeyac lo ne'e cop ca' na'
ša' ca' che yodaon' dan' beyoa' Nabucodosoren'. Perw
na' Jeremíasen' gože'ne':

—Nabucodonosoren' yedetaše' yogo'lo! dan' ne'
chga'an lo' yodaon' güe'en Babilonia, na' con cate'ch
Diosen' güe'e latje, cana'ch yesyežinen da' yoble.

Sedequíasen' gwyejle'e dan' gose' bene' güenlaže'
ca' le' ben' goseziye'e gosene' cheso'e xtiža' Dios

gualaz da' šejle'e ċhe Jeremías. Da'nān' bich bi
goclaže' gwzenague' ċhe rey Nabucodonosoren' la'czla'
le' bzoe'ne' chnabi'e Judá, nach gwnabde' ben' chnabia'
Egipton' gaclene' le'.

Dan' bi bzenag Sedequíasen' ċhe Dios, Diosen' bi'e
latje gweyech Nabucodonosoren' len soldadw ċhe' ca'
goseċhje' ciuda Jerusalén da' yoble, na' bi goso'e latje
no šo' o no yechoj lo' ciudan' lo' tgüiz yo gašjo.
Šlaquen' goc qui, Sedequíasen' gwlo'e Jeremíasen' ližya
to tiemp dan' zoacze zoa Jeremíasen' že' bene' Caldeos
ca' yosožiaye'e ciuda Jerusalénna'. Bia'cze Jeremíasen'
gwzoe' bi'e xtiža' Dios len reyen' na' len bene' Israel
ca' ne' besyega'an Judá. Na' to ža reyen' goxe'
Jeremías na' gwnabde' le' bi cheyała' gone'.
Jeremíasen' da' yoble gože' le' cheyała' gon cuine' lo
na' rey Nabucodonosoren'. Perw Sedequíasen' bžebe'
gone' ca'.

Cate' bžinch to ža bene' Jerusalénna' bich
gosezoede' dan' gosedonen' na' Sedequías len yeto
ċhop bene' gwnabia' ben' gosac le' txen besechoje' lo
ciudan' багаše'ze tže'le gosacłaže' yosoxonje'. Perw
bene' Caldeon' besele'ede' legaque' na' gosezene'ne'.
Nach gosebeje' yejlao Sedequíasen' na' goseċhe'ene'
Babilonia. Na' ca' goc, goc yogo' dan' gosena
Jeremías na' Ezequiel bene' ca' goso'e xtiža' Diosen'
gosene' yesezene' Sedequíasā' na' yeseċhe'e le'
Babilonia. Gague goc sša cate' bene' Caldeos ca'
bosyoċhinje' yodaon' bosyoċhinje' liž reyen' na' yogo'lol
yo'o dan' gosac yo'o güen na' doxen ze'e dan' nyeċhje

ciuda čhegaquen'. Lecze gosote' bene' zan, na' ye
bene' zan ben' ne' zjanga'an gosechi'ene' Babilonia.

129. Bene' ca' ne' nita' Judá ja'aque' Egipto

(2 Reyes 25:22-26; Jeremías 40 — 44; Ezequiel 29 — 32)

Rey Nabucodonosor bene' gwnabia' čhe Caldea,
beyož bžiaye'e ciuda Jerusalénna' na' gwleje' ben'
gože' Gedalías cont goque' gobernador čhe bene' ca'
besyega'an Judá. Na' Jeremíasen' lecze gwzoe' Judá.
La'czla' bene' Caldea ca' gosezene' le' len yezica'chle
ben' gosechi'e da' nechw, perw gwyo'e lo na' to bene'
goc xan soldadw, na' bena' be'e latje bega'ane' Judán'.
Gedalíasen' gože' bene' ca' še yosozenague' čhe
Nebucodonosor bibi de da' cheyała' yesežebe'. Perw
to bene' gože' Ismael betue' Gedalíasen', na'
yezica'chle bene' Judá besežebchgüe' bene' Caldea ca'.
Nach besyečhoglaže' šja'aque' Egiptole cont yesyele'
len bene' Caldea ca'. Gosenita' to čhope xan soldadw
bene' zjambejlagüe' len bene' Judá ca'. Bene' qui
ja'aque' jasene'e Jeremíasen' na' gosenabde' le' nabde'
Diosen' bin' cheyała' yesone'. Gosečhebe' yesone' con
da' ye' Diosen' legaue', perw gague do laže'
chese'nde' yesone' dan' che'ne Diosen' yesone', le ba
besyečhoglaže' šja'aque' Egiptole. Jeremíasen'
gwdixjue'ede' legaue' da' gwna Diosen', gwne':

Cheyała' yega'ane' Judá nga na' ca' gon Diosen'
ga gacch güen čhele. Bi žeble Nabucodonosoren', le
bi güe' Diosen' latj bi gonde' le'e. Bi šejle Egipton'.
Chonle xbab Egipto na'le gacch güen čhele, perw še

šejle bi gac güen çehe, san baļle gatle gwbin na' yebaļle gatle lo gwdiļe.

Beņe' zjambejlagüe' len beņe' Judá ca' bi gosacļaže' yosozenague' çehe dan' gož Jeremíasen' ļegaque', na' gosa'aque' len yogo'loļ beņe' ca' že' Judán' zja'aque' Egipto. Lencze Jeremíasen' gwyeje' len ļegaque' cont be'lenche' ļegaque' xtiža' Diosen'. Egipto na' Diosen' gože' Jeremíasen' ye'e beņe' Judá ca' yešložze na' yid Nabucodonosoren' yedenabi'e Egipton' na' yogo'loļ beņe' Judá ben' že' na' yesate', le chesonxene' no ļgua'a ļsaca' gualaz da' yesonxene' Dios.

Ca tiempna' ciuda Babilonia dan' nacch ciuda blao çehe Caldea, gwzoa Ezequiel ben' be'e xtiža' Diosen', na' gwdixjue'ede' beņe' Judá ca' ben' gwçe' Nabucodonosoren' na'le, gože' ļegaque' gague yesšach cate' beņe' Caldea ca' yesenabi'e Egipton'. Na' ļecze gwne':

—Diosen' ba gwne' gone' cont ne to beņe' ca yesenita' Egipton' to tiemp. Rey Nabucodonosoren' gote' beņe' zan ben' že' Egipton' na' yeyo'e Babilonia na'le yogo'loļ mechw na' bica'chle da' xdan da' yeželde' Egipton' na' ļecze gwžiaye'e yogo'loļ ciuda çehe naciónna'.

130. Rey Nabucodonosor goctonte'

(2 Reyes 25:27-30; Daniel 4)

To šni'a Nabucodonosor rey ɕhe bene' Caldea ca' gwɛde' yel goseɕogue' to yag xen. Nach Diosen' gwsele' ben' gože' Daniel bzejni'ide' le' bi zejen dan' gwɛde' yela'. Gože'ne' zejen lao gaž iz gactonte' na' gagüe' yiɕe' can' chesagw goŋ. Cate'ch ba chache'ede' Diosen' chbeje' bene' chesac bene' gwnabia' ɕhe nación ca', cana'ch yeyacde'. Na' ca' goc ɕhe'. To ža rey Nabucodonosoren' chde' yiɕhjo' ɕhe ližen' chone' xbab naque' bene' zaque' juisyw da' ba bene' cont ciuda Babilonia gan' chnabi'e naquen da' blao da' xen na' da' xdanchgua. Ca' chone' xbab ɕhen' cate' Diosen' bene' le' castigw dan' cha'laže'chgüe', bene' ga goctonte' lao gaž iz. Cate' goc gaž iz na' beyaque' bich goctonte', na' bezoe' gwnabi'e da' yoble. Na' dan' goc ca', gwɛzde' Diosen' nape' la'zelagüe' yela' chnabia' xen na' chone' da' zej to liɕa.

Cate' got Nabucodonosor, xi'ine' ben' gože' Evil-merodac bołane' xlatjen' goque' rey. Na' ca' nac rey Joaquín ben' gwnabi'e nación Judán' cate' Nabucodonosoren' jatiłlene' bene' Judá ca' na' gwɕhe'e zane' Caldean', Evil-merodaquen' bebeje'ne' ližya na' bnežjue' latje bene' žin da' zaca' ɕhe nación Caldean'.

131. Bene' Media ca' na' bene' Persia ca'
 gosone' gan bene' Caldea ca'
 na' gosenabi'e lao zan naci6n

(Daniel 5; 7 — 8)

To xesoa Nabucodonosor gože'ne' Belsasar. Na' cate' bžie' gwnabi'e, Diosen' bene' ble'edagüe ben' be' xtižen' ben' gože' Daniel ċhop da' za' gacle. Dan' ble'edagüede' da' nechon', ble'ede' tap beyixe' be zniachgua chesežašba' lo' nisdan'. Nach Danielen' gwñabde' to angl ca' ze' gała'ze cuiten' bi zejen dan' ble'eden', na' anglen' bzejni'ide' le' tap beyixe' ca' zejen tap naci6n da' yesenabian' naci6n ca' yezica'chle. Lecze bzejni'ide' le' beyixe' be gwdapa' zejen naci6n da' gacch da' gualch lao da' ca' yezica'. Na' ši lozba' dan' žia yichjban' zejen ši rey bene' yesenabi'e, na' to toe' nabi'e late' güeje yežlion'. Lecze bzejni'ide' le' lozba' da' dao' riz dan' ble'e Danielen' da' za' bla'ten ladjo lozba' ca' yeši zejen yeto rey bene' yedabague' Dios na' gone' mal len bene' yesonxene' Diosen'. Perw lecze bzejni'ide' le' gože'ne' Diosen' gone' ben' castigw, nach sele' to bene' galje' benaċh na' yide' to lo bejw cate' yedenabi'e yežlion' toli tocanē.

Ca goc ċhop iz, Diosen' bene' ble'edagüe Danielen' da' yoble. Ble'ede' to xila' mašw na' žia ċhop lozba' na' ton ndonech ca dan' yeto. Na' xilan' nacchguaba' be gual gole, perw na' bla' to šib lez be mašw gwdillemba' leba' na' ben šiba' gan. Na' šiba' toga lozba' da' xen zoa gacho| loxgaban', perw na' gošjen, na' gualaz len besyela' yetap lozba', na' le'e lozban' to

na' bela' yeto da' dao' rizch. Łozba' da' dao' riz nga
 zejen to bene' gacchgüe' bene' ya'alaže' na' bene'
 selaže'. Bena' yochinje' yodaon' na' bich güe'e latje
 šjasesane' dan' chjasesane' chesonxene' Dios. Perw
 Danielen' bende' gwne to angl, gwne' yesyeyone'
 yodao'na'. Nach Diosen' gwsele' to angl ben' le'
 Gabriel jazejni'ide' Danielen' bi zejen dan'
 ble'edagüeden'. Gože'ne' xila' mašon' zejen rey ca'
 ben' yesenabi'e Media na' Persia cate' tiemp da' za'
 za', na' šiba' zejen bene' Grecia ben' za' yesenabia'
 yezdechle tiempna'. Na' bzejni'ide' le' gože'ne' łoz
 šiba' da' nechon' zejen rey nechw ben' gac bene'
 Grecia. Na' yetap łozba' dan' besyela' łoxgaba' gan'
 gwzoa da' nechoa', zejen yetap rey ben' yesebeje' tap
 cuenle nación ca' gan' ba gwnabia' bene' nechon'.
 Łecze gože'ne' łozba' da' dao' riza' zejen to rey bene'
 gacchgüe' bene' mal, na' gonchgüe' mal len ben'
 chesejnilaže' Dios.

To že' rey Belsasar bene' to lni xen na' bene'
 mandadw šjasexi' xmosen' yogo'łol cop na' tas ca' dan'
 jia' rey Nabucodonosoren' lo' yodao' che Dios dan'
 gwzoa Jerusalén. Na' yogo' bene' ca' že' lo lni na'
 chese'eje' vino len cop na' tas ca' na' chosošalje'
 chesene' güenchguan' zjanac lgu'a'a lsaca' chegaque'
 dan' chesejnilaže'. Cate' con gacze gocxe to taca'
 bene' chzoven le'e ze'en gan' nite'na'. Cate' Belsasaren'
 ble'eden', bžebchgüe' na' la' bentie' mandadw gože'
 yogo'łol bene' sina' ben' že' Babilonia cont yese'ene' bi
 ža dan' bzoj taca' ben' le'e ze'ena'. Perw ne toe' ca
 goque' ye'ene' bi žan. Nach no'ol che reyen' jayze'ede'



Mbaben,
mbixen,
nla'an.

Belsasaren' bžebchgüe' na' la' bentie' mandaw gože' yogo'lol
bene' sina' ben' že' Babilonia cont yese'ene' bi ža dan' bzoj
taca' ben' le'e ze'ena'.

Danielen', na' bšaljlene' reyen' gože'ne' can' chon
Danielen'.

Nach gosaxe' Danielen' na' cate' bžine' lagüen',
reyen' gože'ne' gwnežjue'ne' da' zan da' zaca'chgua da'
nac da' xdan na' ľecze ca' gone' ga gague' to bene'
gwnabia' blao ċhe Babilonia še ye'ene' bi zejen dan'
nyoj ľe'e ze'ena'. Nach Danielen' boži'en gože'ne':

—Bibi zelaža' bi goŋo' neda', perw yapa' le' bi
zeje dižan' nyoja'. Chjayze'edo' da' xta'guo'
Nabucodonosor goque' to rey bene' gwnabia'chgua cate'
Diosen' bene' ga goctonte' na' beyaque' ca to beyixe'
na' gwdagüe' yiċe' da' chesagw goŋ lao gaž iz.
Cana'ch gocbe'ede' Diosen' nacche' bene' zaca' juisyw
clel ca ľe'. Na' le' rey Belsasar, ľa'czľa' ŋezdo' can'
goc ċhe da' xta'guo', ba beno' xbab zaca'cho' clel ca
Dios. Ba güe'ejo' vino len cop na' tas ċhe yodao' ċhe
Diosen', na' ba bi'o diža' zjanac ľgua'a ľsaca' ca'
chejnilažon' da' zaca'. Na' lagüe dan' biŋa' gacbe'edo'
yogo'ľoľ da' chac yežlion' yo'on ľo na' Dios, da'nan'
gwseľe' taca' ben' bzojen diža' dan' žan: "Mbabēn,
mbixēn, ŋľa'an." "Mbabén" zejen ba zjambab ža ca'
dan' chnabi'o, na' gague gacch yesša nación gan'
chnabi'on solao yenit yeľa' zaca' ċhen. "Mbixēn" zejen
Dios ba bchixe' le' ca to bene' chchixe' no trigw da'
gote', na' zejen Dios ba gwne'e can' chono' na' bi
chazlažen'. Na' "ŋľa'an" zejen nación ċhio' gan'
chnabi'on, bene' Media na' bene' Persia ca' yeseľe'en.



Danielen' bi bsancze' chołgüiže' Dios.

Že' na'te gosote' rey Belsasaren', na' beyoža' bene'
Media na' bene' Persia ben' chja'ac lao gwdiḷe goso'e
lo ciuda Babilonia da' nacch ciuda blao gan' mbane
Caldea na' to bene' Media gože' Darío bezoe' goque'
rey.

132. Diosen' bosle' Daniel lao leon ca'

(Daniel 6)

Rey Darío gwleje' baḷ bene' na' bzoe' legaque'
cont gosone' žin blao che nación ca' gan' mbanden',
na' Danielen' goque' to bene' ca'. Na' benchgua
Danielen' güen, da'nan' Daríon' bene' xbab gwnežjue'
ḷe' žin blaoch da' gone'. Perw bene' ljež Danielen'
ben' ḷecze goson žin che reyen' txen len ḷe'
gosaclocchgüe' dan' bebeche reyen' Danielen' clēl ca
legaque'. Da'nan' gosezolagüe' besyeyiljwlaže' nacle
yesone' bi da' yosode'ede' cont yesagüe' xya che
Danielen' lao Daríon' yesi'ene' bi chone' güen. Na'
besyeyiljwchgüe' perw bibi besyeželde' bi da' mal
yosode'ede' ḷe', ḷe Danielen' gocchgüe' to bene' ben da'
zej to ḷicha. Nach bene' lježe' ben' besegue'ede' ḷe'
gosone' xbab še yesyeželde' bi da' yosode'ede' ḷe'
neḡhe dan' chejnilaže' Dios. Nach ja'aque' lao rey
jasenabde' ḷe' gone' to ley da' nan ne to bene' bi gac
nabe' goclen lao bene' chejnilaže' o lao nochle bene'
yoble, san toz lao reyen' gac yesenabe' goclen lao
tbio'. Na' še to bene' bi gone' can' ža leyen',
yosozaḷe'ne' to lo' yechw ga že'chgua zan bež znia be
nzi' león be yesagwba' ḷe'. Reyen' bebede' bene'

leyna', le gocde' gonen ga yesaque yogo'lol bene' le' nacchgüe' bene' zaca'. Bi gocbe'ede' še ben' chesegue'ede' Danielen' gose'ene' gone' ley contze gata' da' yosode'ede'.

Danielen' gwyo'olagüe' cholgüiže' Dios šon ni'a tža, na' la'czla' gwneзде' can' nac ley dan' ba de, bi bsancze' cholgüiže' Dios. Na' cate' ben' chesegue'ede' le' besele'ede' cholgüiže' Dios con can' choncze', na' ja'aque' jaseže' reyen' ca'. Cate' gwneze Darion' bi chon Danielen' can' ža leyen', gocchgüe' tole, le bi goclaze' gac bi da' gac che Danielen', perw nacxe gone', le bačhle gwchebe' gone' can' ža leyen', na' žan ca žan cheyala' gone' can' žanna'. Nach bene' mandadw len xmosen' yosozale' Danielen' lo' yechw gan' goseže'e leónna'. Na' rey gože' Danielen':

—Chnablaže'sca' Dios ben' chejnilažon' yosle' le'.

Nach bene' mosen' bosozale' Danielen' lo' yechon' na' bosožie' to yej xen cho'a yechon' cont nono gac yosla Danielen'. Na' že'na' bi goc tas Darion' da' chone' xbab che Danielen'.

Con ca gwyeni' beyečhj ža, Darion' bxonje' gwyeye' jane'e lo' yechon' na' bolgüiže'ne', gwnabde' le' še Dios ben' chejnilaže' goc bosle'ne' cont bi gosagw león ca' le'. Na' Danielen' boži'en, gože'ne':

—iNe' zoacza' rey chia'! Dios gwsele' to angl cont bseyjue' cho'a leónna', le bibi da' mal bena' da' zaca' gata'.

Daríon' bebecgüede' cate' bende' chñie' na' cate' gwñezde' can' goclen Diosen' le', nach bene' mandadw len bene' xmosen' yesyebeje' Danielen' lo' yechua'. Na' besyebeje' le' na' yogo'lole' besele'ede' ne late'ze ca nchoxe ndagüe'. Nach Daríon' bene' mandadw yesegüe'e ben' chesegue'ede' Danielen' lo' yechw gan' že' leónña'. Na' león ca' bosozoxj bosotimba' legaque' cate' za' yeyožle yeselažoe' lo' yechua'. Nach rey Daríon' bene' to ley ga chone' mandadw yogo'ze bene' yesezoe' bala'an Dios ben' chonxen Danielen'.

**133. Šlac gosenabia' Darío len Ciro Diosen' bzejni'ide'
Danielen'
bica' da' ca' za' za'ac**

(Daniel 9 — 12)

To ža lo iz nechw dan' chnabia' Darío bene' Median', Danielen' blabe' libr gan' nyoj xtiža' Diosen' dan' bzoj Jeremías. Na' bene' xbab che dan' bzoj Jeremíasen' gan' gwe' te gayonši iz nach bene' Israel ca' yesyeyonšagüe' ciuda Jerusalén dan' bosožiayi' bene' Caldea ca'. Nach Danielen' bene' gwbas bolgüiže' Dios, gože'ne':

—Bezi'xenšca yogo' da' xinj dan' ba ben neto' bene' Israel.

Na' lecze gwnabde' Diosen' gwnežjue' latje yesyežine' lažgaque' da' yoble na' yesenite' binlo. Gože' Diosen':

—Nezczeda' yogo'lol dan' gosac che neto' ba gosaquen con can' nchoglaoczen le'e ley dan' bzoj da' Moisés, le dan' chzaca'zi'to' naquen da' cheyała'cze gac dan' bi bzenagto' chio'.

Nach Diosen' gwsele' angl ben' le' Gabriel cont bzejni'ide' Danielen' da' za' gacle. Na' Gabrielen' gože'ne':

—Gaže cuen tiemp cheyała' ten gayonši ni'a cate' za' yeyož yežlio nga. Nach žin ža cate' benachen' bich yesone' da' xinj, san tlaoze da' güen yesone'. Cana' yesac yogo'lol da' güen dan' ba goseyixjue'e bene' ca' ba goso'e xtiža' Diosen', na' da' yoble le'e bene' Israel gonxenle Diosen' yodao' che' dan' zoa Jerusalén. Na' cheyała' te gaže cuen tiemp, chzolaon ža cate' reyen' gone' mandadw šjaya'ac bene' Israel ca' Jerusalén cont yesyeyone' yo'o ca' na' yosyoxie' ciuda Jerusalénna' da' yoble, na' te yegayonchope tiemp na' yid ben' nzi' Mesías, zeje diža' ben' gwlej Diosen' cont yedenabi'e, na' yeyož te tiemp nga yesote'ne'. Na' yesedob soldadw ca' yesedillene' bene' že' ciuda Jerusalén na' yosyočhinje' yodao' blao che Diosen' len yogo' yo'o ca' zjazoa lo ciudan'. Nach te tiemp dan' yeto cuen. Na' cate' yeyož doxen tiempen', cana'ch yesac yogo'lol yela' yaše' yela' zi' da' ba bžia bia' Diosen' yesac cate' ba zoa yeyož yežlion'.

Can' gož anglen' Danielen'.

Nach bžin ža cate' Ciro ben' goc bene' Persia gwzoe' goque' rey. Šlac chnabia' Ciron' Diosen' bene' ble'edagüe Danielen' da' yoble, perw Danielen' bi

gwyejni'ide' bi zejen dan' ble'edagüeden'. Da'nan' bolgüiže' Diosen' gwnabde'ne' gwzejni'ide' le' bi zejen. Nach Diosen' gwsele' to angl cont bzejni'ide' le' bi zejen. Anglen' gože' Danielen':

—Leca chaque Diosen' le' na' cheyaļa' gonšco' xbab che da' nga nia' le'.

Nach anglen' bzejni'ide' le' che rey ca' za' yesenabi'e na' can' yeson to toe'. Na' gože'ne' žin ža cate' za' to rey len soldadw che' ca' yesedillene' bene' Israelen', na' gwžone' šjasesane' bi dan' chjasesane' lao Diosen' cate' chesonxene'ne'. Bena' gone' bi da' zban lo' yodao' che Diosen'. Na' la'czļa' reyen' gaque' to bene' malchgua, zan bene' Israel yesone' txen len le'. Bia'cze yesenita' baļe' yesedillene' rey, le chesacde' Diosen' na' chesacļaže' yesone' con can' chazļaže' Dios. To ža rey mala' gate' nach yid angl ben' le' Miguel ben' chap nación Israel. Gata'chgua da' zed, perw Diosen' yosle' bene' Israel ca'. Techle žin ža cate' Diosen' yosbane' bene' ca' ba gosat na' baļe' yesenite' mbalaz len le' toļi tocaņe na' bene' ca' yezica' yesezaca'zi'e toļi tocaņe.

134. Isaías bzoje' xtiža' Dios len bene' Israel ca' besyežin Judá

(Isaías 40 — 66)

Gwzoa to bene' be' xtiža' Dios bene' gože' Isaías. Bena' bzoje' bene' Judá ca'. Bzoje' che dan' goseche'exoxj bene' Caldea ca' lega'aque' Babilonia ga

besyega'ane' zan iz, na' bzojen' cate' bina' gac ca'.
Gože' legaue':

—Diosen' gože' neda' yeyoe'xena' le'e na' yapa' le'e ba gwzaca'zi'le che yogo' da' mal ba benle. Gwne' zoa to bene' latje daš che'e chio' cheyała' gonšagüe'cho yichjlažda'ochon' cont soacho lez gwzenagcho che Diosen' cate' yide'. Goncho ca' cont yogo' bene' že' yežlion' yesele'ede' ca bene' šagüe' bene' güen naque'. Yogo' benačh chesede che' ca chesede che no yej o no yiže' dao', perw ca nac xtiža' Diosen', len zoan toli tocanē, gague da' te chen. Gož bene' Judá ca' Dios chechon' ba zoe' ni. Ze'e cont gague' bene' gwnabia' checho na' güia ne'e yogo' bene' yo'o lo ne'e ca to bene' güen bene' güeyoe xila' chgüia chne'e xila' chen' binlo.

`Diosen' naque' to bene' zaca'chgua na' to bene' sina'chgua, na' chnabia'che' ca yogo' bene' že' yežlio nga. Bi naque' ca nac lgua'a lsaca' ca' da' cheson bene'. Chosočhine' toz bčhecw yag na' gašjen chesone' guague na' yegašjen chesone' lgua'a lsaca'. Bi chesacbe'ede' ca bene' stonten' zjanaque', nēca chac yosota ni'a ne'en, nēca chac yesaclenen bene' chesonxenen'. San Diosen', len' chnabia'che' ca yogo' bene' že' yežlion'. Noch no zoacze bene' nac can' nac le'. Gwbat cheyała' nacho Diosen' bi chle'ede' da' chac checho, le gwbat cheche'ede' na' chejni'ide' yogo'lol. Še šejnilaže'cho Diosen', gaclene' chio' na' yeyone' chačh laže'cho cate' ba chjaḡaque'echo.

`Diosen' ba gwne': "Yogo' bene' že' yežlion' cheyaļa' yesonxene' neda', le nedan' yo'o lo na' doxen yežlion'. Na' le'e bene' Israel, ba gwleja' le'e nacle yež chia'. Cate' nita'le yež zito' neda' bena' bela'le lažle nga, le nacle bene' güen xšina'. Bi žeble, le neda' zoacza' len le'e na' chaclena' le'e. Gona' cont yesezaca'zi' note'tez bene' chesaclaže' yososaca'zi'e le'e. La'czļa' bi nacle bene' zan, neda' zoacza' chaclena' le'e."

`Diosen' ľecze že': "Seļa' len le'e to bene' zaca' bene' gon xšinan'. Spiritw ċhian' soan len le' na' con da' nac ľicha gone' len yogo' bene'. Bi te' gosye'e, neca gaque' to bene' loc. Nach yogo'ze bene' yosozenague' da' gwsed gwlo'ede'."

`Jehová naque' dogualje Dios, na' bi güe'e latje yesonxen bene' bichle da' yoble, san gone' castigw bene' cheson ca', le da' ľicze notech no bene' yoble zaca' gonxencho.

`Diosen' ľecze že' qui: "Le'e bene' Israel, !ľegwzenag! ľa'czļa' ba bedabaga'le neda', yezi'xena' ċhele neċhe da' cheyaše' cheži'ilaže'da' le'e. Na' seļa' yejw da' chyažjele lo yežlio ċhele, na' seļa' Spiritw ċhian' soan len le'e. Lecz gona' cont ciuda Jerusalén ċhelen' yeyaquen to ciuda xen da' yoble. Na' cont gac dan' žia' nga, gwċhina' rey Ciro ben' nabia' gan' nzi' Caldea, ľa'czļa' le' bi nombi'e neda'. Benan' gwsane' le'e yeyejle Jerusalén ga solaole yeyonľe yodao' ċhian'. Šlac chnabia' Ciron', gona' castigw

be_{ne}' Caldea ne_{če} da' bososaca'zi'e le'e na' ne_{če} da' zjanaque' be_{ne}' chesa'laže'."

`Ca nac le'e, Diosen' che'e le'e: "Cheya_{la}' šjaze'ele cana' gwdix_{jue}'eda' gwnia' gona' saca'zi'le, na' na'a ba_{ch} gwzaca'zi'le can' ba gwnian'. Perw bi benan' saca'zi'le cont gw_{ži}aya'a le'e, san benan' cont gwzenagle _{chia}'. Šaca' bzenagle _{chia}' cana', gwbat goc _{che}le yogo' da' qui. Na'a leyeza' ciuda Babilonia na' yeyejle Judá. Neda' gaclena' le'e. Na' ca nac be_{ne}' cheson da' xin_j, chgue'eda' legaque' na' gona' ga yesezaca'zi'e."

`Nach Diosen' že': "Be_{ne}' zaca' ben' se_{la}' gon xšinan', leca gwze _{che}'. Be_{ne}' že' nación zan doxen yežlion' yesyebande' lagüe', le yesele'ede' da' nono na' le'e na' da' nono na' güe' diža' _{chen}. Cuerp _{che} bena' se_{lan}' gaquen caxe, ne_{cach} gaquen ze cuerp _{che} be_{ne}' tantw yososaca'zi'ene'. Žaglaochgüe'. Yogo'ze be_{ne}' yese_{gue}'ede'ne' na' yesone' xbab bibi zaque'."

`Na' dan' žaglagüe'na', žaglagüe' da' zaca' žaglao chio'. Gacde' zi' ne_{če} da' xin_j dan' ba ben chio'. Na' ne_{če} dan' gacde' zi', Diosen' yezi'xene' _{che} da' xin_j da' ba bencho. Naccho ca nac xila' be ba gosacžeje, perw Diosen' se_{le}' le' saca'zi'e gualaz chio'. Cate' yesezi'diža' be_{ne}' le', bi yoži'e xtiža'gaquen'. Na' yesote'ne' la'cz_{la}' bibi da' xin_j none'. Techle la'laogüe yogo'lo_l dan' bene' na' yogo'lo_l dan' gwne' nacchguan da' güen. Ne_{če} le' yezi'xen Diosen' da' xin_j da' ba goson be_{ne}' yoble.

Isaíasen' lecze gwne':

—Diosen' že': "Yogo' no chyažje bi dan' chyažjede', cheyała' yedenabden' neda', na' gwnežjua'ne' dan' chyažjeden'. Le'e chonchguale žin na' bibi chle'ele che žin chelen', perw še gwzenagle chia' nach gac güen chele. Chgua'a da' bałi gaclena' le'e, na' da' chnia' neda' gague da' te chen. Neda' gacda' le'e tołi tocanę, na' le'e cheyała' gwzejni'ile bene' zito' ca' chia' neda'."

`Diosen' zoe' netec na'a, chbeze' yolgüižchone'. Yezi'xene' che note'tezcho še yolgüižchone' na' cuejyičjcho da' xinj da' choncho. Dan' chon Diosen' bi chonen' can' chon chio' xbab cheyała' gonen', san chonen' binloch. Cate' Diosen' že' gac to da' gac, guacczen.

`Diosen' že' yogo' chio' cheyała' goncho da' güen na' bich goncho da' xinj. Cheyała' yezi'laže'cho ža che'. Na' toz ca gon Diosen' güen len bene' zito' na' len chio', con še chesacde' le' na' chosozenague' che'. Len legaque' guac yeside' yedesesane' beyixe' yesonxene' Diosen' yodao' chen', le gaquen to latje ga gac yesid bene' že' doxen yežlio yesolgüiže'ne'.

`Diosen' že' la'czła' naque' bene' zaca'chgua na' bene' laždao' xilaže', bene' bi non da' xinj, chaclene' bene' bi chesa'laže'.

Beyoža' Isaíasen' gwne':

—Diosen' že': "Bene' Israel, bałle con chnazle cate' žale chonxenle neda', le leca chsaca'zi'le bene güen žin chele. Cheyała' gonele bene' güen na' gacle

beṇe' šagüe' len beṇe' yašen', gague tale gonzle ze
beṇe' chonxenchgua neda'."

`Ca nac beṇe' zaca' ben' seḷa' Diosen' gon xšinen',
qui že': "Zoa' Spiritw ɕhe Diosen' len neda', na'
Diosen' gwleje' neda' zedeya' diža' güen len beṇe'
yaše'. Gwseḷe' neda' zedeyena' cont yesyeyaclaže'
beṇe' ca' chesacyaše'de'. Za'a cont gwsana' beṇe' ca'
zjade ḷižya. Na' zedetixjue'eda' ba bžin ža gaclen
Diosen' beṇaɕhen'. Lecze gwseḷe' neda' zedetixjue'eda'
žin to ža cate' gone' saca'zi' beṇe' güen da' xinj, na'
beṇe' zoa yaše', gua' ḷegaque' yela' chebe."

Isaíasen' gwnache':

—Diosen' lecze ba gwne' gonchgüe' güen len beṇe'
chesonxen ḷe', perw gone' ga yesat beṇe' chesonxen
ḷgua'a ḷsaca'. Žin ža gata' to tiemp xen cate' yesezoa
beṇe' binḷo. Cana' bež znia ca' bich yesomba' znia,
san yesašba' yese'ej yesagwba' txen len xila' ca'. Na'
lez cana'ch notno beṇaɕh gone mal len beṇe' ḷježe'.

135. Rey Ciro be'e latje šjaya'ac beṇe' Judá ca' Jerusalén

(2 Crónicas 36:20b-23; Esdras 1 — 2)

Cate' rey Nabucodonosor gwɕhe'e beṇe' Judá ca'
laže' gan' nzi' Caldea, zane' besyega'ane' ḷo ciuda
Babilonia na' gosenite' gayonši iz gan' gosondadze'
xšin beṇe' Babilonia ca'. Na' dan' bi gosenite'
lažgaquen', nono ben goz go'on ḷo yežlio ɕhegaque'
dan' de Judá. Goc ca' ḷe Diosen' bžie' bia' yesone'

goz go'on lagüen xop iz güeje na' bi yesonen žin iz gaže, perw legaue' bi bosozenague' che'. Da'nan' Diosen' gwçhogbi'en yega'an yežlion' nono gon len žin lao gayonši iz da' non che iz ca' gosaze' caten' bi cheyała' yesaze'. Yogo' da' quinga gosaquen con can' gwna Jeremíasen' cate' be'lene' legaue' xtiža' Dios.

Na' cate' ba goc gayonši izen', bene' Caldea ca' bich gosaue' bene' gual, san bene' Media na' bene' Persia gosaue' txen gosenabi'e nación zan doxen gan' ba gosenabia' bene' Caldea ca', na' to bene' Persia gože' Ciro goque' rey. Iz nechw cate' gwzolao chnabia' Ciron' Diosen' bene' cont beyaše'de' bene' Israel ca' že' Babilonian'. Da'nan' bzoje' to ley da' žan: "Dios ben' zaca' gonxencho ba bene' latje naca' rey na' chnabi'a yogo' nación da' zjaže' lo yežlion'. Na' le' ba gože' neda' cheyała' gona' to yodao' che' Jerusalén. Da'nan' note'tez bene' Israel bene' zjanita' yogo' nación gan' chnabi'a guac šjaya'aque' Jerusalén cont šjaseyene' yodao' che Diosen' na'. Lecz ca' chona' mandadw bene' gualiž che bene' Israel ca' šjaya'aquen' yesaclene' legaue' len da' ca' cheseyažjde' cont yesone' yodaon', na' lecze yosonežjue' beyixe' yesot bene' Israel ca' cate' yesonxene' Diosen'."

Nach bene' ca' zjanac bene' blao ben' gosaljē' lo diaža che da' Judá na' che da' Benjamín, txen len bene' ca' zjanac bxoz na' len yezica'chle bene' gosaljē' lo diaža che da' Leví gosene' šjaya'aque' šjaseyene' yodaon'. Na' bene' gualiž che bene' Israel ca' šjaya'ac Jerusalén bosonežjue' legaue' mechw na' bichle da' zaca' cont gosaclene' legaue'. Na' tas ca' na' cop ca'

che yodaon' dan' bia' rey Nabucodonosor cana'ate, rey Ciron' bonežjuen' Zorobabel ben' gocch bene' blao lo diaža che da' Judán' cont beyo'en Jerusalén gan' yosočhinen' da' yoble. Beyožen' bene' zan bene' Israel jaya'aque' Judá, gosac do čhopeyon mile'. Baļe' jasyenite' Jerusalén na' yebaļe' jasyenite' yezica'chle ciuda ca' že' Judá.

136. Bene' Israel ca' gosone' yeto yodao' che Diosen' Jerusalén

(Esdras 3 — 6; Hageo 1 — 2)

Cate' bžin bio' gaže che izen' besyežin bene' Israel ca' Judá, yogo'cze' besyedobe' Jerusalénna' cont gosone' lni che Diosen' dan' nzi' lni che Ranšw Yix. Na' Jesúa ben' goc bžoz blao na' Zorobabel ben' goc bene' blao lo diaža che da' Judá gosone' to mes ga gosote' beyixe' gosonxene' Diosen'. Gosone' mesen' chyo'o che yodao' blaon' dan' bosyočhinj bene' Caldea ca', con gan' gwzoacze mes xen čhen' cana'. Gosonen' cont goc gosone' lnin' con can' nžia bia' ley čhegaquen' dan' bzoj da' Moisésen'.

Cate' beyečhj iz, bio' gwchope che iza' Jesúa len Zorobabelen' gosone' mandadw yesezolaģüe' yesone' yeto yodao' che Diosen' da' yosočhine' laz dan' gwžiai'i'. Na' žan' cate' beyož gosečhize' lenen, bžoz ca' bosocueže' trompeta čhegaquen' na' yezica'chle bene' byo zjanac diaža che da' Leví bososiže' platiy čhegaquen' na' yogo'cze' gosole' gosonxene' Dios, na' gosenita'chģüe' mbalaz.

Ba^l be^{ne}' ca' zjanita' Jerusalén ca tiempa' bi gosaque' be^{ne}' Israel, le rey che be^{ne}' Asiria gwsele' be^{ne}' ziton' jasenite' Judá. Na' be^{ne}' zito' ca' zjanita' na' besegue'ede' be^{ne}' Israelen', na' gosonlede'ne' gose'ene' yesaclene' legaque' yesone' yodaon', perw gague do lažen' gosene' yesaclene', san gosaclaže' yesebeque' da' zed len legaque'. Jesúa, Zorobabel na' yezica'chle be^{ne}' ca' bosose'e žin^{na}' gosache'ede' can' chesaclaže' yesone' na' gose'e legaque' bi cheseyažjde' yesaclen no be^{ne}' zito' legaque' len žin^{na}'. Gose'e be^{ne}' zito' ca' legacze' yesone' yodaon' con can' ben rey Ciro mandadw yesone'. Nach be^{ne}' zito' ca' besyeyiljwlaže' bichle da' yesone' cont be^{ne}' Israel ca' bi gac yeson yodao' chegaque'. Na' bosonežjue' mechw che no be^{ne}' Persia ben' cheson žin da' zaca' che be^{ne}' gwnabia' cont yesagüe' xya che be^{ne}' Israel ca' lao reyen' na' gosesele' cart che reyen' gose'ene' be^{ne}' Israel ca' chesedabague' len le'. Da'nan' reyen' bene' mandadw cueze žin^{na}'. Cate'ch ba chnabia' rey ben' gože' Darío II, cana'ch bezolao žin da' cheson be^{ne}' Israel ca' da' yoble cont gwy'a yodao' che Diosen'.

Šlac chnabia' Dario II, Diosen' gwsele' chope be^{ne}' goso'elene' be^{ne}' Israel ca' xtižen', ben' gose'e Hageo na' Zacarías. Hageon' gože' Zorobabelen' len Jesúan':

—Le'e len yezica'chle be^{ne}' Israel gualaž chechon' žale bi^{na}' žin ža yezolaole yeyonle yodao' che Diosen', la'czla' yogo' le'e ba ben ližle da' xdan na' da' güen. Da'nan' Diosen' chone' cont bi chac yejw

na' chone' cont bi chac güen ġhele. Coseš ġhele bi naquen güen na' bi detec da' ye'eġ gagwle na' xaġana'le. Le šjaḡi' yag ca' da' cheseyažje cont gonġe yodaon', na' le yezolao žinṅa' da' yoble.

Cate' Zorobabelen' na' Jesúan' gosende' xtižen' besežebe', perw na' Hageon' gože' ġegaque':

—Bi žeble, ġe Diosen' zoe' len le'e.

Can' goc, Diosen' bene' ġhaġh laže' Zorobabelen' len Jesúan' cont yesezolagüe' žinṅa' da' yoble. Nach gwde yeto ġhope xman besyezolaogüe' žinṅa'.

Cate' ba goc tbio' chesone' žinṅa', Diosen' gože' Hageon' diža' da' be'lene' bene' Israel ca' da' yoble cont benche' ġhaġh laže', gože' ġegaque':

—Diosen' že' bi soayaše'le dan' bitec nac yodao' nga xdan can' goc dan' gwzoo cana'. Na' bi žeble, ġe soacz Diosen' lo' yodaon' na' gacchen da' zaca'ch ca dan' gwzoo cana'.

Cate' ba gwde ġhop bio' Diosen' gože' Hageon' güe'lenche' bene' Israel ca' diža' da' yoble cont yesache'ede' chebede' dan' ba chesone' yodaon', da'nan' gone' yesac güen ġhegaque'.

Za' besyezolaote bene' Israel ca' chesyeyone' yodaon' cate' baġ bene' gwnabia' ġhe Persia ben' chesegue'ede' ġegaque' besežine' gosenabe' no bnežjw ġsens yesyeyone' yodaon'. Bene' Israel ca' bosyoži'e xtiža'gaque' gose'ene':

—Rey Ciron' ben ġsens.

Nach bene' gwnabia' ca' zjanac bene' Persia
 gosesele' to cart lao rey Darío II gosenebe' še da' li
 rey Ciron' bnežjue' lsens yesyeyon bene' Israel ca'
 yodao' čhegaquen'. Bene' Israel ca' con gosoncze' žin
 šlac chesebeze' bi na reyen'. Na' cate' bžin carten'
 lao reyen', bene' mandadw len bene' güen žin čhe' ca'
 cont besyeyiljue' dan' bzoj rey Ciron' še bene'
 mandadw yesyeyon bene' Israel ca' yodao' čhegaquen'.
 Na' bežel dan' bzojen'. Nach rey Darío II gwsele' to
 cart lao bene' ca' chesegue'ede' bene' Israel ca', gože'
 legaue' bi cheyała' yosožone' yesyeyon bene' Israel
 ca' yodaon'. Lecze gwne' mechw da' cheseyixjw
 yogo'lol bene' da' nzi' impuesto bi yeseselen' lao le',
 san yosočhinen' čhe gastw čhe yodao' dan' cheson
 bene' Israel ca'. Na' che'n ca' che'ne bene' gwnabia'
 ca' gosaclene' bene' Israelen'. Can' goc gwyala'
 yodaon' lao iz gwxop dan' chnabia' rey Darío II.

Beyož goson bene' Israel ca' yodaon' da' yoble,
 gosone' to lni cate' gosone' yodaon' lo na' Diosen'.
 Gosote' be zan beyixe' gosonxene' Diosen' na' yogüe'
 gosenita'chgüe' mbalaz. Nach gosone' yela' güexi'a
 cont gota'bia' can' yeson yogo'lol bžoz ca' žin čhe
 yodaon' na' bichle da' yeson yezica'chle bene' ca'
 gosalje' lo diaža čhe da' Leví, cont gosonyane' can'
 bžia bia' da' Moisésen'. Na' izen' yeto gosone' lni
 dan' nzi' Pascw na' gosenita'chgüe' mbalaz dan' goclen
 Diosen' legaue' besyeyone' yeto yodao' čhe'.

137. Zacarías gwdixjue'ede' xtiža' Diosen' len
bene' Israel ca' besyežin Jerusalén

(Zacarías 1 — 14)

Lao toz iz caten' Hageo be'lene' bene' Israel ca' xtiža' Diosen', yeto bene' gože' Zacarías lecze be'lene' legaque' xtiža' Diosen'. To ža Zacaríasen' gože' legaque':

—Diosen' že' še yezolaocho gwzenagcho che' nach gaclene' chio'. Bi cheyała' goncho can' goson da' xozxta'ocho. La'czła' bene' zan gosodelene' legaque' xtiža' Diosen' gosata'yoede' legaque' yesebejyichje' da' xinj dan' chesone', da' xozxta'ocho ca' bi gosacłaže' yosozenague'. Da'nan' Diosen' bene' latje goc yogo' da' zed da' bosnisde' legaque' yesac, na' cate' ba chesezaca'zi'e gosacbe'ede' chesac chegaque' con can' cheyała'cze yesac.

Diosen' bene' ble'edagüe Zacaríasen' bał da' za' yesac. Da'nan' gwyejni'ide' žin ža cate' Diosen' gone' yesac güen che bene' že' ciuda Jerusalén da' yoble. Zacaríasen' lecze be'e diža' che to rey bene' nabi'e, gwne' žine' Jerusalén žie' cože' burr ca to bene' bitec bi zaca', perw le' nabi'e doxen yežlion'. Gwne':

—Žin ža cate' chio' bene' Israel le'echo Dios na' gacbe'echo chio' benechone' zi'. Cana'ch soayaše'cho. Perw Diosen' yezi'xene' che yogo' da' xinj da' ba bencho, na' gone' gwbatch nita' lgua'a lsaca' da' yesonxen bene' Judá nga. Diosen' seche' lo ya'a da' nzi' Olivos na' ya'an la'an yeyaquen chople. Nach Diosen' nabi'e bene' že' doxen yežlion'. Cate' ba

chnabi'e bich gac šeže'le, san gac lagüe ža do tiemp.
Cana' Diosen' gone' yesezaca'zi' bene' ca' chesegue'ede'
chio' bene' Israel.

**138. No'ole le' Ester chosle' bene' Israel
lao yela' goten'**

(Ester 1 — 10)

Gwzoa to rey bene' gwnabi'e gan' nzi' Persia lie'
Asuero. Na' leca bže'e no'ol che' ben' le' Vasti dan'
bi gwyeje' gan' bene' to lni. Na' gwnita' bene' blao
ben' chosozejni'i reyen' can' chesacde' cheyała' gone',
na' legaque' gose'ene' cheyała' cho'one' Vasti na' si'e
yeto no'ole yoble cont yogo' no'ol ca' lo nacióŋŋa'
yesacbe'ede' cheyała' yesape' bene' chegaque' bala'an
na' yosozenague' chegaque'. Gwyazlaže' reyen' can'
gosena bene' ca', na' bene' mandadw len xmose' ca'
yeseyiljue' zan no'ol güego' no'ol zjanac xdan na'
yeseči'ebe' šjanita'be' liže' cont cueje' tobe' si'e gacbe'
xo'ole'.

Ciudan' gan' zoa rey Asueron' nzin' Susa, na' lecz
lo ciuda Susan' zoa to bene' Israel ben' le'
Mardoqueo. Na' Mardoqueon' ba boscha'ogüe' to bi'
no'ole le' Ester, bi' che da' bene' xe', le ba gosat
xaxna'be'. Na' Esteren' ba nacchguabe' no'ole xdan na'
bene' ca' cheseyiljue' no'ol güego' ca' chnab reyen'
besele'ede'be' na' goseči'ebe' liž reyen' len yezan no'ol
güego' ca'. Na' mos ben' yo'o lo ne'e no'ol güegon'
ba zjanita' liž reyen' bebede' can' chon Ester na'
benchgüe' güen len lebe'. Bene' ca' zjanita' liž reyen'



Reyen' bebede' Esteren' clel ca yezica'chle no'ol güego'
ca'. Da'nan' gwque'ebe' ca xo'ole'.

bi gosache'ede' nache' bi' Israel, le Mardoqueon' gože' Esteren' ne to nono ye'be' nache' bi' Israel. Do iz besyega'an bi' no'ol ca' liž reyen' na' yogo' ža Mardoqueon' gwyeye' janabe' rson che Esteren'. Cate' goc tgüiz zoabe' liž reyen', bžin že' cate' beyala'be' soalembe' reyen' to že' cont gone' xbab še chazlaže'be' si'ebe' gache' xo'ole'. Na' reyen' leca bebecchde' Esteren' clel ca yezica'chle no'ol güego' ca'. Da'nan' gwque'ebe' ca xo'ole', neca gocbe'ede' še nache' no'ole Israel.

To ža cate' chope bene' chesonlene' reyen' žin chosošalje' šižize', Mardoqueon' gocbe'ede' chosoxi'e nacle yesone' cont yesote' reyen'. Na' gwyeye' je'lene' Esteren' diža' can' chesaclačže' yesone' cont bosnisde' reyen'. Nach rey Asuero beyiljwyože' še naquen ca' na' gota'bia' le naquen can' gož Esteren' le'. Na' bene' byen gosot xmose' ca' chopte bene' ca' gosaclačže' yesote' le' gosegüe'e do yengaque' na' lecze bene' mandadw yosozoje' doxen can' goquen' le'e libr che' gan' cho'en diža' che yogo' da' ba goc šlac chnabi'e.

Na' gwzoa yeto bene' chonlene' reyen' žin ben' le' Amán. Na' reyen' gwyazlačže' can' chon Amánna' na' gwlo'e lo ne'e mandadw da' zaca' da' gone', na' bene' mandadw yogo' bene' naciónna' yosozoa xibe' lao Amán cont yesape'ne' bala'an. Yogo'ze' gosone' ca', toz Mardoqueo nan' bicze bzoa xibe' lao Amánna'. Da'nan' Amánna' bža'achgüe' Mardoqueon' na' gwzola'güe' cheyiljwlaže' nacle gone' cont gote' Mardoqueon' len yezica'chle bene' Israel ca'. Cate' ba bečhoglačže' naquen' gone' nach gwyeye' lao to bene'

ben rifa cont gwneзде' bi ža nac güen yesote' bene' Israel ca', na' cate' gota'bia' bi ža cheyaļa' yesote' legaque', nach gwyeye' je'lene' reyen' diža'. Gože'ne' nita' to cuen bene' zjaṇasłase' doxen gan' mbande' bene' cheson güedenag len ley čhen' na' gože'ne' cheyaļa' yesote' bene' ca' cont bich gata' da' zed gan' chnabi'ena'. Reyen' gože' Amánṇa' le nacczen güen yesote' ben' cheson güedenag len ley čhen', na' gože'ne' guac gone' con ca chaclaže' par yonitlagüe' legaque'. Lecze gože'ne' gwžie' bia' can' cheyaļa' yesote' bene' ca' na' gwzojen' cont šejen lao justis bene' ca' chesenabia' to to yež doxen gan' mbande'. Na' bnežjue' Amánṇa' niy čhe' cont gwčhiše' sellw čhe' le'e yiš da' sele' yež ca' cont yeseneзде' naquen da' ba bžia bia' reyen' gac. Nach Amánṇa' bene' mandadw bzoj to bene' cart ca' da' gwsele' čhe justis ca' ben' že' to to yež gan' mbane rey Asuero, gože' legaque' yesote'ne' ža can' bchojen le'e rifan', žana' cheyaļa' yesote' yogo' bene' Israel ca' že' lo yeža'.

Cate' Mardoqueon' gwneзде' can' ža cart ca' da' ba zja'ac to to yež, gwzoayaše'chgüe', na' lecz ca' gosenita'yaše' yezica'chle bene' Israel ca'. Na' to čhop bene' ca' cheson žin liž reyen' gose'e Esteren' besele'ede' Mardoqueon' na' nacbia' ba zoayaše'chgüe', le ba nyaze' lache' gasj da' naquen zeše' na' ba chbežyaše'chgüe'. Da'nan' Esteren' gwsele' to bene' gan' zoa Mardoqueon' jaṇabe' bix chac čhen' chbežyaše' ca'. Cate' jaṇab mosen' bi chac čhe', Mardoqueon' gože'ne' ba bosežie' bia' yesote' yogo' bene' Israel gualaž čhen'. Na' gwsele' to yiš da'

gwlab Esteren' gan' cho'en diža' doxen can' chesena' cart ca' dan' ba zja'ac to to yež. Na' le'e carten' gože' Esteren' šeje' lao reyen' nabde'ne' yosle' bene' gualaž čhegaquen' cont bi yesote'ne'. Cate' bežin mosen' liž reyen' gože' Esteren' yogo' dan' gwna Mardoqueon' na' blo'ede'ne' yišen' gwselen'. Nach Esteren' gwsele' mosen' gan' zoa Mardoqueon' da' yoble cont šježe' le':

—Bi de lsens šo'a güe'lena' reyen' diža' bate'teze. Con cate'ze chaxe' neda' chac cho'a gan' zoen', le reyen' chote' note'tez bene' cho'e gan' zoen' cate' bi chaxe' le', šinga chac cho' to bene' še cate' reyen' chlis ne'e gan' noxe' xis de oro čhen' cont chone' lsens šo'e güe'lene' le' diža'. Perw neda', ba goc to bio' biṇa' gax reyen' neda' cont güe'lena'ne' diža', na' bi cheyaxjda' ša'a cate' biṇa' gaxe'nda'.

Nach mosen' gwyeje' ježe' Mardoqueon' doxen can' gwna Esteren'. Na' Mardoqueon' boži'en gwne':

—Bi cheyała' gon Esteren' xbab bibi gac čhe' dan' naque' no'ol čhe reyen', le naque' bene' Israel na' bia'cze yesote'ne' txen len yezica'chle neto' bene' Israel. Na' še bi chzane cuine' cont gaclene' bene' gualaž čhe' ca', Diosen' seła'lje' bene' yoble cont gaclene' neto' na' Esteren' cuiaye'e. Yo'one' cheyała' gone' xbab Diosen' bzoalje' le' liž reyen' contze gaclene' neto' bene' gualaž čhe na'a dan' chac čheto' quinga.

Cate' bežin mosen' liž reyen' na' gože' Esteren'
yogo'lol can' gwna Mardoqueon', nach Esteren' gwsele'
rson lao Mardoqueon' da' yoble, gwne':

—Guaccze šjanaba' lsens güe'lena' reyen' diža'
la'czla' gote' neda'. Perw zgua'tec che'nda' gwtobo'
yogo'lol bene' gualaž chechon' že' ciuda Susa nga na'
le gon gwbas šone ža šlac yolgüižle Diosen' nabelene'
gaclene' neda'.

Bebe Mardoqueon' cate' gwnezde' ba gwcheb
Esteren' nabde' reyen' yosle' legaue', na' btobe' bene'
gualaž chegaquen' cont gosone' gwbas na' bosolgüiže'
Diosen' šone ža. Nach Esteren' bene' mandadw len
mos che' ca' yososini'e cont yesone' to lni che reyen'.
Nach gwyaze' xe' da' nacch da' zaca'ch na' da' xdanch
na' gwyeye' cho'a puert gan' zoa reyen', gwñabe' lsens
šo'e. Nach reyen', cate' ble'ede' Estera' gwlis xis de
oro chen' cont gwneze Estera' guac šo'e gan' chi'ena'.
Na' reyen' gože'ne':

—Gwnašč neda' bin' chaclažo'.


Nach Esteren' boži'en gože'ne':

—Chaclaža' yidšco' txen len bene' migw chio'
Amán gagwle xgüe gan' ba bososini'a mos chia' ca'
ña'aža.

Na' reyen' gože'ne':

—Guaccze, na' yidto'.

Na' cate' bžin hora' ja'aque' jasedagüe' xgüe gan'
goxe' legaue', na' beyož besyedagüe' cate' za'
yesyeya'aque' Estera' gože' legaue':



Cate' reyen' ble'ede' Esteren', gwłis xis de oro chen' cont
gwęeze Estera' guac šo'e gan' chi'ena'.

—Chaclaža' yidle da' yoble yeteyo cont gagwle
xgüe da' gwsini'a chele, na' cana'ch ni'a le'e to da'
yo'o yichja', to da' chaclaža' gac.

Šlac zjayda Amánna' do chanez bežague'
Mardoqueon' na' da' yoble Mardoqueon' bicze bzoa
xibe' lagüe' can' cheson yezica'chle bene' cate'
chesyežague' Amánna'. Nach Amánna' zjayde' liže'
chlocchgüe'. Nach Amánna' go'olaže'chgüe' na' be'lene'
no'ol chen' diža' na' ba| bene' migw che' ca' che
yogo' da' güen dan' chac che, da' ba naque' bene'
gwni'a, na' ba nita' bi' zan bi' che', na' ba gwlej
reyen' le' cont chone' to žin da' zaca' che gobiernen'.
Na' ľecze go'olaže' dan' gox no'ol che reyen' le' txen
len reyen' cont gosagüe' xgüe žana' na' gwne' šja'aque'
da' yoble yeteyo. Na' gože' no'ol chen' na' bene'
migw che' ca' ľa'czļa' chac güen che' len yogo' da'
ca', bicz bi güen zoe' šlac ne' zoa to bene' Israel
bene' le' Mardoqueo ben' ľecz chone' žin che reyen',
ľe benga bi chape'ne' bala'an. Nach no'ol chen' len
bene' migw che' ca' gose'ene' de to da' gone' cont gac
soe' mbalaz. Gosi'ene' cheyaļa' gwzoe' to yag da'
nacchgua tone cho'a ližen' na' šezile yeteyo ye'e
reyen' yesote' Mardoqueon' yesegüe'e do yene' le'e yag
siben'. Amánna' gwyazlaže' can' gosene' cheyaļa' gone',
na' ľa' bentie' mandadw yosozoa xmose' ca' yagen' že'
na'te.

Na' reyen', bi goc tase' že'na'. Nach bene'
mandadw jaxi' xmosen' libr chen' gan' nyoj yogo' dan'
ba goc tža tža šlac chnabi'e, na' bzenague' blab
mosen' da' zan da' ba goc. Na' do ba gwye'ni' blab



Amánna' gože' no'ol chen', bicz bi güen zoe' šlac ne' zoa
to bene' Israel bene' le' Mardoqueo, le benga bi chape'ne'
bala'an.

mosen' gan' cho'en diža' ċhe dan' ben Mardoqueon'
cont gosezene' ċhope bene' ca' gosacłaže' yesote'
reyen'. Nach reyen' gwnabe' bi da' ba gosone' cont
goso'e yeła' choxcłen ċhe Mardoqueon' neċhe da' güen
dan' bene'. Na' xmose' ca' gose'ene' bibi na' yesone'
par yeso'e yeła' choxcłen ċhe'.

Za' beyošte gosie'ne' ca' cate' bžin Amánna' liž
reyen', gocde' nabe' yesote' Mardoqueon'. Perw za'
ye'e reyen' can' chaclaže' yesone', cate' reyen' gože'ne':

—¿Bi chacdo' cheyała' gona' cont gwlo'a
chebechgüeda' can' ba ben to bene' chonlen neda' žin?

Amánna' bene' xbab še reyen' cho'e diža' ċhe le',
nach gože'ne':

—Cheyała' gwnežjo'ne' tgot xao' da' nac güenchgua
ċhaze' na' gwsoa corona ċhion' yiċhje' na' gwži'one'
cože' cabayw ċhio', na' seło'ne' do lagüe ciuda nga
cont yesele'e bene' yeža' cho'one' yeła' bala'an. Na'
seło' to bene' güen žin ċhio' šejlene' le' yosye'e ne':
"Quinga choe' reyen' yeła' bala'an ċhe ben'
chebechgüede' can' ba bene'."

Nach reyen' gože'ne':

Nacczen güen can' gwnaon'. Gwyej bedao'nez
btobe da' ca' chyažjen cont gono' ca' len bene' Israel
ben' le' Mardoqueo, le che'nda' güe'chwne' yeła' bala'an
doxen can' ba gwnaon'.

Na' chen' ca che'ne Amána' benšaze' doxen can'
gože' reyen'. Na' zil na'teze bguacue' Mardoqueon'
lache' šagüe' ċhe reyen', bžie' corona ċhe reyen'

yichje', bži'ene' cože' to cabayw che reyen' na' gw̃chi'ene' doxen lagüe ciudan'. Na' šlac zja'aque'na' chosya'ašaze': "Quinga choe' reyen' yela' bala'an che ben' chebechgüede' can' ba bene'."

Beyož bene' ca', Amánna' beyej liže' do zoayaše'ze' do chacde' zto', na' gože' no'ol che' na' bene' migw che' ca' can' ba goquen'. Nach legaque' gose'ene':

—Še Mardoqueon' naque' to bene' Israel, bibi de da' gac gono' cont cuiaye'e, san gone' cont le' cuiayo'o.

Ne' cheso'elentie' le' dižan' ca' cate' besežin mos che reyen' par yesechi'ene' gagüe' xgüe len reyen' gan' ba gox Esteren' legaque'. Nach gwejlene' mos ca'.

Ba gosezolagüe' chese'eje' to da' bnežjo Esteren' legaque' cate' reyen' gw̃abde' le' bin' chaclaže' gone'. Na' Esteren' gože'ne':

—Ch̃abda' le' to goclen xen, yoslašco' neda' na' bene' gualaž chia' ca' lo na' bene' ca' chesacclaže' yesote' neto'. Šaca' šinze ta'oto' gacto' esclavos bibi zed gonda' le', perw ba zoa yesote' neto'.

Nach reyen' do chebanchgüede' gw̃abde'ne' non' ba goljlaže' da' mal xenna' nac ca'. Na' Esteren' gože'ne':

—Ni zoa ben' ben ca', le Amán ni chgue'echgüede' neto'.

Leca bžeb Amánna' cate' bende' xtiža' Esteren', na' reyen' blocchgüe' na' bchojsese' zeje' do gan' zjaze yag

cho'a yo'ona'. Nach Amánna' gwzolagüe' gwneyoede' Esteren' yezi'xene' çhe', na' jaxoe' lo diván gan' xoa Esteren' chone' descans na' gota'yoechde' le' yeyaše'de'ne' cate' congacze bezyo'o reyen'. Na' cate' ble'e reyen' xoa Amánna' cuit no'ol çhen' leca blocche' le', le godde' še Amánna' chaclaže' gata'lene' no'ol çhen'. Nach mos ca' gosenize' Amánna' na' toe' gože' reyen' ba ze to yag sib liž Amánna' dan' godde' gwçhine' cont cue'e do yen Mardoqueon' gote'ne' na' len guac gwçhine' par gote' Amánna'.

Nach reyen' gwne':

—Na'teze gotchone'.

Na' can' gosone'. Na' gwde gosote' Amánna' Esteren' gože' reyen' Mardoqueon' naque' bene' zan ble'e. Na' reyen' gwlo'e lo na' Mardoqueon' žin zaca' dan' gwyo' lo na' Amánna'.

Bia'cze ne' nac diža' yesote' bene' Israel ca', le ba zja'ac carten' lao justis ca' çhe to to yež gan' mbane reyen'. Nach Esteren' gwyeje' gan' zoa reyen' da' yoble na' da' yoble le' gwłise' xis de oron' cont gwyo'e. Nach da' yoble gwnabde'ne' gone' cont bi yesote' bene' Israel gualaž çhe' ca' can' bžia bia' Amánna' yesone'. Perw reyen' gože'ne' cart ca' dan' ba gwsela' Amánna' ba zjanyišen sellw çhe' na' nono gac yoša' can' žanna'. San da' gac yesone', le' na' Mardoqueon' guac yosozoje' yeto cart da' nan can' cheyała' yesone' na' yeseselen' leçz len sellw çhe reyen'. Da'nan' legaque' bosozoje' yeto cart da' gosesełe' da' žan cate' žin žan' zjanžie' bia' yesote'

bene' Israel ca', de lsens yeson cuingaque' defender yesedillene' ben' chesaclače' yesote'ne'. Na' gosenabe' bi dižan' chesac bene' že' to to yež cont bosozoje' carten' xtiža'gaque' to to yež gan' ja'aquen doxen gan' mbane Asueron'.

Cate' bžin žan' zjanžie' bia' yesote' bene' Israel ca', bene' Israelen' gosote' yogo' xi'in Amán na' gosote' yezan bene' gosache'ede' ba chesegue'ede' legaue'. Bene' Israel ca' že' Susan' na', čhop ža gosote' bene' ca' chesegue'ede' legaue', na' beyožen' gosone' to lni xen dan' chesyebede' ba gosebiayi' bene' ca'. Na' Mardoqueon' gwsele' to cart lao bene' Israel ca' že' to to yež gože' legaue' cheyała' yesone' to lni čhen yogüiz cont šjasyeze'ede' dan' goclen Diosen' legaue' bosyonitlagüe' bene' ca' chesegue'ede' legaue'. Can' goc gwzolao cheson bene' ciuda ca' lnin' ža' šino' čhe bio' šižinw yogüiz, na' bene' ca' že' do ga nac yež dao' chesonen' ža žta' čhe bio'na', lni nga nzin' Purim.

Na' ca nac Mardoqueon', goque' bene' zaca' lo gobiern čhe Persia, na' toz reyen' gocche' bene' blaoch ca le'. Na' Mardoqueon' goclenchgüe' bene' Israel gualaž čhe' ca', na' yogo'cze bene' goso'ene' yela' bala'an xen.

139. Bxoz ben' gože' Esdras beyeje' Jerusalén

(Esdras 7 — 10)

Ba gwdele čhoa iz goson bene' Israel ca' yodao' che Diosen' da' yoble, cate' to bxoz čhegaque' ben' gože' Esdras beze'e Babilonia dan' nacch ciuda blao gan' mbane Caldea beyeje' Jerusalén. Esdras goque' to bene' ba nsede' ley che Dios. Bene' can' žanna' na' blo'eden' bene' yoble. Na' rey che Persia ben' ba chnabia' Caldea bi'e latje jaya'ac laž note'tez bene' Israel ben' ne' nita' Caldea con bene' gosaclačže' jaya'aclene' Esdras. Nach zan bene' Israel ca' lente bał bxoz čhegaque' na' yebał bene' gosaljē' lo diaža che da' Leví jaya'aque' len le'. Na' rey che Persian' bi'e le' mechw cont si'e beyixe' gote'ba' gonxene' Dios, na' reyen' gwčhebe' čhixjue' bite'tez da' yeseyažjde' na' gague da' na'ze, san lecze gwsele' to cart lao bene' gwnabia' che' bene' Persia ca' že' Judá, gože'ne' chžone' yosočhixjue' da' nzi' impuestw bxoz ca' len yezica'chle bene' gosaljē' lo diaža che da' Leví. Na' bene' mandadw len bene' Persia ca' zjanac bene' gwnabia' ben' že' Judá yeso'e Esdras mechw na' bi da' yese'ej yesagw bene' ca' yeson žin lo' yodao' che Diosen'.

Caten' za' yesyeya'ac bene' Israel ca' Babilonian' šjaya'aque' Judá, gosone' gwbas na' bosolğüiže' Dios gosenabde' le' gwgüia ne'e legaque' lo nez. Gosone' quinga, le Esdras gocde' zto' nabe' soldadw lao reyen' bene' yesape' legaque' lo nez, le ca nac bačhze gože' reyen' Diosen' chaclene' bene' chesonxene' le'. Na'

Diosen' boži'e dan' gosenab bene' Israel ca' lagüen' na' goc güen čhegaque' lo neza'. Lecz ca' yogo'lol ša' ca' de la'ay na' len mechw čhe yodaon', besyežinen binlo Jerusalénna', bibi da' zed gota'.

Cate' Esdras bežine' Jerusalén ble'ede' zan bene' Israel ca' na' lente yeto čhop bxoz na' nochle bene' ca' zjanac diaža čhe da' Leví ba bosošagne'e len no'ol nación yoble bene' chesonxene' lgu'a'a lsaca'. Esdras gocyasčhgüede' na' bolgüiže' Dios, gože'ne':

—Xana' Dios, da' xozxta'oto' bi bosozenague' čhio' na' cont gosezaca'zi'e le' bnežjo' latje bene' ca' besegue'e legaque' gosote'ne' o gosečhi'e legaque' yež zito'. Na' la'czla' ba beno' latje bela'to' Jerusalén ni na' beyonto' yodao' čhion' da' yoble na' beno' cont rey čhe Persian' gosaque' bene' güen len neto', bia'cze ba chonto' da' malen' da' yoble.

Šlac Esdras cholgüiže' Diosen' bene' gualaž čhe' ca' besedobe' cue'ej cuiten' na' gose'ene' yesyesele' yogo'lol no'ol zito' ca' šjasyezoe' gan' zjazoa xaxna'gaque' na' lecze yesyesele' bi' čhegaque' bi' gosenita' len no'ol ca'. Na' ca' gosone', besyesele' lažgac yogo'lol no'ol zito' ca' ba bosošagna'lene' na' lecze besyesele' bi' čhegaque' bi' ba gosezan no'ol ca', le ley čhe Diosen' benen mandadw bene' Israel ca' bi gac yosošagna'lene' no'ol zjanac no'ol nación yoble.

140. Nehemías bene' chach laže' bene' Israel ca' cont
besyeyonšagüe' ze'e dan' nyechje Jerusalén

(Nehemías 1 — 7)

Nehemías goque' to bene' Israel na' bene' to žin
zaca' che rey Artajerjes che Persia. Gwzoe' Susa
ciuda dan' nacch ciuda blao ga mbane Persia. To ža
bi' biše' Hanani na' bał bene' Jerusalén gosa'aque' Judá
na' besyežine' Persia. Nehemíasen' gwnabde' legaque'
nac chac che bene' Israel ca' že' Jerusalénna'. Na'
legaque' bosošaljlene' le' yogo'loł da' zed dan' de len
bene' ca' bi chesele'ede' legaque' güen, le ze'e dan'
nychje Jerusalénna' ne' nyinjen con can' bga'ānen
caten' gwde bosyochinj soldadw che Nabucodonosor
rey che Caldean' len. Cate' bene Nehemíasen' da' nga,
gwzoayaše'chgüe' na' bolgüiže' Diosen' gože'ne':

—Xana' Dios, len' naco' bene' zaca'chgua. Bate'tez
chonczo' con can' ba gwlo'o cho'o gono' len bene'
chesacde' le' na' chosozenague' ley chion'. Neto' bene'
Israel bi bzenagto' ley chion'. Da'nan' bi'o latje ben'
cheseque'ede' neto' gosechi'ento' ga nac zito' len lažto'.
Perw le' ba gwnao' še yezolaoto' gwzenagto' chio' da'
yoble, le' gono' latj yeyej lažto'. Na'a goclenšca neda'
na' ben ga gac reyen' bene' šagüe' len neda' cate' ša'a
šjanabda'ne' gwsane'nda' yeya'a Judá.

Gwde to chop bio' to ža cate' jasane' cop da'
chož vino che rey, reyen' gocbe'ede' zoayaše'
Nehemíasen', na' gwnabde' le' bičhen' zoayaše'.
Nehemíasen' bžebe' perw ben chach laže' gože' le'
bixchen', gwne':

—Bi gac soa mbalaz, le nezda' ne' nyinj ciuda Jerusalénna'. Na' še chazlažo' can' ba bena' xšinon', chnabda' le' gonšco' to goclen yeselo'nda' Judá cont šjayenšagua' ciuda Jerusalénna'.

Reyen' bečhoglaže' yesele' le', na' bzoe' le' goque' gobernador che Judá. Lecze bnežjue' le' cart da' beyo'e che bene' gwnabia' che' ca' že' to to ciuda da' zjanita' gała'ze Judá. Le'e carta' gože' legaquer cheyała' yesaclene' Nehemíasen'. Can' goc boži'i Diosen' dan' gwnabe Nehemíasen' le'.

Nach Nehemíasen' beze'e zjayde' Jerusalén do goc ši'in iz beza' Esdras. Na' goc šon ža bežine' Jerusalénna' btobe' bał bene' byo na' ba goł gwyeye' jane'e ze'en chyažjen yeyaquen. Perw ne to bene' Israel ca' bi gože' bin' che'nde' gone'. Cate' beyož jane'e ze'en na' gwyeye' ježe' bene' gualaž che' ca' che'nde' yesaque' txen na' yogo'lole' yesyeyonšagüe' ze'en. Bzejni'ide' legaquer can' gwčheb reyen' gaclene' legaquer. Na' yogo'lole' gosazlaže' can' gože' legaquer. Nach gosezolagüe' gosone' žin.

Gosenita' šone bene' blao bene' gose'e Sanbalat, Tobías na' Gesem. Leca besegüe'ede' bene' Israel ca'. Cate' legaquer gosenezde' bene' Israel ca' ba gosezolagüe' chesyeyonšagüe' ze'e dan' nyečhje Jerusalénna', gosezolagüe' chesonle' čhegaquer na' bosode'ede' legaquer gosene' chesyedabaguer rey che Persia. Nach Nehemíasen' gože' legaquer nezde' Diosen' gaclene' le' len bene' gualaž che' ca' cont yesyeyonšagüe' ciudan'. Na' lecze gože' legaquer bi

cheyala' yesenite' Jerusalénna', le gague zjanaque' bene' Israelen'.

Nach bene' Israel ca' con zja'accze' cheson xšinen' na' goseļa'a xšingaquen' late' güeje, na' bene' zjanac toz yež toz ga gosone' žin. Gosonchgüe' žinna' len ze'en na' lec̣z ca' len puert ca'. Sanbalat na' Tobías gosonlachcze' čhegaque' gosene' gague da' yesyeyožde' yesone' ze'en na' bedao yeyinjen'. Perw Nehemías gwnabde' Dios gac̣lene' legaque' na' gone' ga gac čhe Sanbalat na' Tobías yogo' da' mal dan' chesenablaže' čhe bene' Israel ca'.

Cate' bene' Israel ca' ba besyeyone' gašjw ze'en ben' chesegue'e legaque' beselocchgüe' na' besyechoglaže' yesediłlene' legaque' cont bich gac yesone' žinna'. Cate' bene' Israel ca' gosenezde' dan' chesene' yesone', bosolğüiže' Dios gosenabde'ne' gac̣lene' legaque' na' lec̣ze bosonite' bał bene' yesape' gan' chesone' žinna'. Nach bene' ca' chesyeyonšagüe' ze'ena' besežebe' yesonche' žinna', perw Nehemíasen' gože' legaque' yesončhačhlaže' yesonche' žinna' na' bi yesežebe' yesediłlene' bene' ca', le Dios gac̣lene' legaque'. Cate' Sanbalat na' Tobías besele'ede' ba zjansini'a čhe bene' Israel ca' cont yesediłe', nach bich bi gosonde' legaque'. Nach bene' Israel ca' besyezolagüe' chesyeyone' ze'en. Nehemíasen' bnite' gašje' chesone' ze'en na' yegašje' chesape' gan' chesone' žinna'. Lec̣ze yogo' ben' cheson žinna' zjanao spada čhegaque'. Na' lec̣ze bzoa Nehemíasen' to bene' gwcueže' to trompeta cont yesacbe'ede' še cheyala' yesediłe'. Šlac na' yogo'ze bene' ca' cheson žinna'

chesyega'ancze' lo ciuda na'ze chesetase', bi chjaya'ac ližgaque', na' chesetase' zjanacwteze xe' na' spada čhegaquen' zjaden' cuitgaquen' cont bedao'nez yesase' yesediļe' še ben' chesegue'e legaue' yesezolagüe' yesediļlene' legaue'.

Šlac chesyeyonšagüe' ze'en, Nehemíasen' gwñezde' bene' Israel ca' ben' zjanac bene' gwñi'a chesegue'e bi čhe bene' gualaž čhegaue' ben' zjanac bene' yaše' cont yesondadzebe' xšingaque', na' lecze chesegue'e no yežlio čhe bene' yaše' ca' neče da' chesale' čhegaue'. Nehemíasen' gwdiļchgüe' legaue' na' jayse'ede' legaue' gože'ne' ley čhe Dios bi choen' latj yesone' dan' nac ca'. Nach gosečhebe' yosyonežjue' yo čhe bene' da' ba goseque'e na' lecze yososane' ben' ba goseque'e cont chesondadze' xšinen'. Nehemíasen' bi bčhixjue' bene' Israel gualaž čhe' ca' da' nzi' impuestw da' gacbande' la'czļa' zac ša bene' ca', le gwñezde' legaue' cheyaļa' yeseyixjue' da' zčha'o impuestw len reyen'.

Nach bžin ža beyož besyeyonšagüe' ze'en, perw bina' yosonite' puert ca' cho'a ze'en. Na' cate' Sanbalat, Tobías na' Gesem gosenezde' ba gwy'a ze'ena', gosaclaže' yesonlede' Nehemíasen', gosenabe' choje' ciudan' cont yesyežague' len le'. Perw gague do laže' chesaclaže' yosošaljlene' le', san cheseyiljwlaže' nacle yesone' choje' Jerusalénna' cont yesote' le'. Perw Nehemíasen' bi blažoe' lo tramp čhegaquen', san gwsele' to rson da' žan: "Dechgua xšina' na' bi gac yida', le chona' to da' chonchguan byen." Legaue' gosaxe' Nehemíasen' yešon ni'a na' le'

con ca'cze boži'en. Nach gosaxe' le' da' yoble na' bosocuiše' le' gosene' che'nde' co'oyele' bene' yesedabague' rey che Persian' cont žine' gague' rey che Judá. Perw Nehemíasen' gocbe'ede' chesaclačže' yosošebe' bene' Israel ca' cont bich yosonite' puert che ze'en. Da'nan' boži'en gože' legaquer xtiža'gague' naquen to da' güenlačže'ze.

To že' Nehemíasen' gwyeye' jane'e to bene' gocde' naque' xmigüe' na' benga gože' le' že'na' ben' chesegue'e le' yesaclačže' yesote'ne', na' gože' le' cheyala' šeje' šjacuaše' lo' yodaon'. Perw Nehemíasen' boži'en gože' le' bi gone' ca', le šinze bxoz ca' chac cheso'e lo' yodaon'. Gwdechle gocbe'e Nehemíasen' Sanbalat na' Tobías na' goseyixjue' benga cont gože' le' gone' ca'. Le ša Nehemíasen' jašo'e lo' yodaon', legaquer goc bosocuiše'ne' lao bene' gualaż che' ca' yesene' bene' to da' mal.

Gwde goc dan' nac qui, gague yesšach na' beyož besyeyonšagüe' doxen ze'en. Yelate'ze ca' goc chop bio' gosežede' besyeyonšagüen'. Na' cate' beyož besyeyonšagüe' ze'en, yogo' bene' že' gala'ze Judá lente ben' besegue'ede' bene' Israel ca' gosacbe'ede' le Diosen' ba goclene' legaquer. Nach Nehemíasen' gwleje' ba! bene' cont yesape' cho'a puert che ze'en na' gože' legaquer cheyala' yososeyjwchache' puert ca' caten' chacchgua zeye' šlac bene' byo ca' chesyezi'lačže'. Gosone' ca' cont bi yeso'o bene' ca' chesegue'e legaquer, le ze'ena' nyechjechguan zcha'o yežlio perw bene' zjazoa na' bi zjanaquer bene' zan.

Nach Nehemíasen' bti^{pe}' laže' zanch be^{ne}' Israel cont
šja'aque' šjasenite' ciuda Jerusalén^{na}'.

**141. Esdras na' Nehemías bosozejni'ide' be^{ne}' Israel
ca' cheya^{la}' yosozenague' che Dios**

(Nehemías 8 — 13)

Bio' gaže che izen' cate' be^{ne}' Israel ca' beyož
besyeyone' ze'e xen da' nyečhjen ciuda Jerusalén,
yogo' be^{ne}' Israel ca' zjanita' Judá ja'aque' Jerusalén
na' gosone' lni dan' nzi' lni che Ranšw Yix. Cate' ba
besedob yogo'cze', b^xoz čhegaque' ben' gože' Esdras
bzaše' yiš xen gan' byoj da' ca' bžia Diosen' bia'
yesone' dan' goc to yiš da' ndobe, na' blaben'. Gwzie'
gan' nac sibe cont yogüe' gosende' dan' blaben'. Na'
bi nacho blabzen', san lecze bzejni'ide' bi zeje to to
cuen dan' blabe' neche yesone' can' žanna', na' be^{ne}'
ca' gosalje' lo diaža che da' Leví gosone' txen len
Esdrasen' bosozejni'ide' be^{ne}' yežen' bi zejen. Beyož
gosejni'i be^{ne}' Israel ca' dan' bžia Diosen' bia' yesone',
gosacbe'ede' ba gosonchgüe' güedenag len Diosen', na'
gosacyaše'chgüede' lo' lažda'ogaque'. Nach Esdras len
governador čhegaquen' ben' gože' Nehemías, na' len
be^{ne}' ca' gosalje' lo diaža che da' Leví gose'e be^{ne}'
ca' zjanžaguen' bi cheya^{la}' yesacyaše'de' lo lnin', le
zjanaquen ža cate' cheya^{la}' yesyebede' lao Diosen'.
Nach be^{ne}' ca' že' to to yo'o jasečhogue' xoze' yag
can' ža ley che Dios yesone', goson ranš dao'
čhegaque' gan' gosenite' lo lnin'. Zelao cate' da' Josué
gwče'e be^{ne}' Israel ca' Canaán gosone' lnin' cayanen'

Esta ilustración
no está
disponible.

**Bxoz c̣hega'aque' ben' gože' Esdras bzaše' yiš xen gan' byoj
da' ca' bžia Diosen' bia' yesone' na' blaben' gosene yogo'
bene' Israel ca'.**

ža Diosen' na' ba goc zan gayoa iz bina' yesonchen' ca'.

Gwde lnin', cate' bžin ža tapechoa ľecze ċhe bio' na', besyedobe' da' yoble cont gose'e Dios chesacyaše'chgüede' ċhe yogo' da' xinj da' ba gosone'. Zgua'tec bosozenague' ley ċhe Dios da' blab to bene', nach bosoľgüiže' Dios gose'ene' chesacyaše'de' na' chesyetinjde' ċhe yogo' da' xinj ca' gosone', na' beyoža' goso'e yela' choxcwlen ċhe Dios na' gosonxene'ne'. Yeto da' gosone', goso'e diža' ċhe yogo' da' ben Diosen' goclene' da' xozxta'ogaque' gwzolaon len da' Abraham bžinten caten' bene' ca' chesegue'e ľegaque' goseċhe'exoxje' ľegaque' nación zito'. Nach gosenabde' Diosen' gaclene' ľegaque' yeto, ľe ne' zjanaque' ľo na' rey ċhe Persia ľa'czla' ba besyežine' Judá da' yoble.

Nach bene' Israel ca' gosego'o cho'agaque' yesone' can' ba bžia Diosen' bia' yesone'. Goseċhebe' bi yosošagne'e len bene' bi zjanaque' bene' Israel, na' goseċhebe' bi yesezi'e bite'teze da' chote' bene' ľo ža ċhe Dios, neca yesone' ca' bichle ža ľni ċhe Dios, ľe bene' zito' ca' chesešabe' da' yesezi'e ľo ža ca'. Ľecze goseċhebe' bi yesone' yežlio ċhegaquen' žin ľo yogo' iz gaže; goseċhebe' yososane' bene' ca' ba goseque'e cont gosondadze' xšingaquen' da' bi goc yesyeyixjue' xmechwgaque' da' chesaľe'; na' goseċhebe' yeseyixjue' da' cheyaľa' yeseyixjue' ċhe yodaon' cont gata'cze da' cheyaľa' yesac ľo na' Diosen'.

Lecze bosoxi'e nac yesone' cont nita'ch bene'
Israel ca' lo ciuda Jerusalén, gosechoglagüe' yosolabe'
yogüe' na' toe' lao šie' šjasoe' Jerusalén, gague len
bene' ca' chesenabia'.

Cate' ba gwde šižinw iz, Nehemías gweyeje' Persia
da' yoble jayne'e rey Artajerjes. Na' šlac bi zoe',
bħoz ben' gože' Eliasib be'e latje gwzoa bene' amonita
gože' Tobías to lo' cuart che yodao' che Dios, la'czla'
bena' bgue'ede' bene' Israel ca'. Goc to ċhop iz,
Nehemías bežine' Judá da' yoble, na' bža'achgüe' cate'
gwnezde' zoa Tobías lo' cuart che yodaon', le chžon
ley che Dios yeso'o bene' amonitas ca' yodaon'. Nach
bebeje' yogo' xšinlaz Tobíasen' lo' cuarten' na' bene'
mandadw gosone' can' ža ley che Dios cont cuarten'
beyaquen xilaže' lao Diosen'.

Yeto da' goc šlac bi gwzoa Nehemíasen', bi
goseyixjue' bał bene' ca' zjanac diaža che da' Levi
che žin da' gosone' yodaon', na' benen byen jaya'aque'
yež dao' ca' gan' nac lažgaque' gosone' žin cont
gosacbane'. Cate' bežin Nehemíasen' jayxi'e legaque'
cont gosone' žin lo' yodao' dan' zoa Jerusalénna' da'
yoble na' gwleje' bene' gosac lo ne'e yeseyixjue'
legaque'. Nehemíasen' lecze gocbe'ede' bał bene' Israel
chesone' žin ža che Dios na' yebale' chja'aque'
Jerusalén ža che Dios chjasete' yela' guagw. Da'nan'
bene' mandadw bi yesesaljue' puert ca' zjazoa le'e ze'e
xen dan' nyechje ciudan' lo ža che Dios. Can' goc,
cate' bene' zito' ca' besežine' Jerusalén besyega'anšaze'
cue'ej cuit ciudan' gwdete ža che Dios. Lecze gwdile
Nehemíasen' bene' zito' ca' cont gosenezde' bi güe'e

latje bi da' yesote' lo ža che Dios, nachen' gosebeze' bich ja'aque' Jerusalén ža che Dios. Na' gwnita' bene' ba bosošagna'lene' no'ole bi zjanac no'ole Israel, na' Nehemías be'e castigw che bene' ca' goson ca', na' bene' byen gosečheb bene' Israel ca' bich yesone' ca'. Lecz bebeje' to bχoz lo xšinen', le bχoza' ba nšagna'lene' to no'ole naque' xi'in ben' gože' Sanbalat, bene' bgue'ede' bene' Israel ca'.

142. Malaquías be'lene' bene' Israel ca' xtiža' Dios

(Malaquías 1 — 4)

Nehemíasen' gwnabi'e šlac besyeyon bene' Israel ca' ze'e xen da' gwyechjen Jerusalén, na' gwdena' Diosen' gwsele' to bene' gože' Malaquías be'lene' bene' ca' že' Judá xtiže'. Gože' legaque':

—Diosen' že' le'e nacle bχoz bitw chaplene' bala'an ca cheyała'. Cate' chotle beyixe' be chzeyle lao Dios, chbejle no be xinj, no be güe' gualaz be zjanac be güen. Na' bene' lo yeža' lecze bi chesape'ne' bala'an cheso'e no be xinj, no be güe' cate' chesonxene' Diosen'. Bi cheyaxjele gwnežjwle bene' gwnabia' chelen' be bi zjanac be güen cate' chchixjue' le'e che impuestw, perw chaquele Diosen' bi gacbe'ede' chnežjwlene' be xinj na' be güe'. Bene' za'ac nación zito' chesonche' güen, le legaque' chjasesane' da' nac güench cate' chesonxene' Dios.

'Le'e nacle bχoz cheyała' gwzejni'ile bene' che Dios. Gualaz da' gonle ca', chgo'olene' nez mal da'

chzejni'ilene' diža' güenlaže'. Da' xozxta'ocho ca' gosego'o cho'agague' yosozenague' che Dios cont gone' lo na'gague' yežlio nga na' cont yesenite' binlo, perw le'e bi chonle can' gosego'o cho'e gonle, na' da'nan' nono chesap le'e bala'an.

'Bene' gualaž, ne len benač, ne len Dios bi chonle can' ba gwlo'o cho'ale gonle. Chšagna'lenle bene' bi zjanac bene' Israel, na' le'e nšagna'le chela'ale len no'ole chele. Diosen' bi chzenague' xtiža'le, le žale nac güen da' cheson bene' ca' cheson da' mal, neca chacbe'ele clelen' choe'le diža' žale Diosen' bi chone' da' zej to li. Nacczen da' li žin ža cate' Diosen' sele' to bene' güe'e xtiže' cont benačhen' yosozenague' che' caten' yid cuine'. Nach Diosen' yide' gan' zoa yodao' che'. Canan' nono zaca' gon cuine' bene' güen lao Diosen', le nombi'e yičhjaždao' benač. Yebejteccze' yogo' da' mal da' yeželde' lo' yodaon' cont bħoz che' ca' yosonežjue'ne' da' zaca' yosonežjue'ne'. Diosen' gwlo'e nape doļa' che yogo' da' xinj da' ba benle, le chonle no yela' guaža', cheyata'lenle no'ole bi zjanac no'ol chele, na' chziye'le no bene' yaše', no bene' zito'. Nacbia' bi chaple Diosen' bala'an da' chonle da' zjanac ca'.

'Diosen' zoe' chone' con can' že'. Da'nan', še le'e gonle can' gosego'o da' xozxta'ocho ca' cho'e yesone', nach Diosen' gone' güen len le'e can' gwne' gone'. Cheyaļa' gonle lo na' Dios to cuen lao ši cuen che coseš chele da' chedobe, con can' bžie' bia' goncho. Legon ca' na' leña'šc še bi gacchgua güen chele da' chonle ca'.

‘Le’e žale bibi zejen gwzenagle che Diosen', le chata'ch yela' gwni'a che bene' ca' bi chosozenag che' cle ca che le'e. Žale ba gosone' güedenag len Diosen' na' bibi da' mal na' gac chegaque'. Perw cheyała' nezele Diosen' že' ba zoa žin ža gwžiaye'e bene' mal ca' can' chzeycho no beb, san bene' ca' yosozenag che', güenchgua yesac chegaque'. Da'nan' cheyała' cue' yichjcho gwzenagcho che da' ca' bzejni'i da' Moisésen' da' xoxxta'ocho ca' lo ya'a Sinaí da' bžia Diosen' bia' goncho.

Malaquíasen' lecze gwne':

—Žin ža cate' Diosen' sele' ben' le' Elías güe'e xtižen', na' Eliasen' gone' cont bene' ca' bi nita' binlo len xi'ine' ca' yesenite' binlo len legacbe' da' yoble cate' za' te che yežlion'.

Esta ilustración
no está
disponible.

